

平定粵寇紀略

一函
十三冊

平定粵寇紀略卷十五

同治二年癸亥正月曾營鮑軍進援涇縣解圍

正月初一日僞匡王僞奉王僞襄王等率眾六七

萬竝糾合僞躡王藍姓等花旗廣賊進逼涇縣連

壘二十餘座於初四日架梯蒙絮悉銳撲城守將

易開俊等以木石下擊賊稍斂退時浙江提督鮑

超在高祖山老營聞警簡隊疾往初五日入城初

六日出戰羣賊蠡擁來撲戰逾兩時我軍佯退誘

賊入伏兩面夾擊賊大敗欲歸壘見壘中火起已

爲我軍所破各兵勇乘勢呼譟竝進立解城圍長
驅三十餘里又平黃邨賊壘十餘處初七日自涇
縣回軍適西河之賊撲進老營將圖一逞南望旂
幟蔽空軍容甚盛乃相顧錯愕曰鮑超來矣一聞
而散

浙軍攻復湯溪龍游蘭溪三縣遂克金華府城

金華羣賊以湯溪龍游蘭溪三城爲外護踞獨久
迨官軍圍攻湯溪疊敗賊援勢始漸蹙正月初十
日布政使蔣益澧密約降賊彭禹蘭內應誘擒僞

忠裨天將李尙揚等賊目八名潛啟西門官軍衝入斃賊九千餘名克復縣城援賊向金華狂奔總兵高連升等率軍追殺龍游之賊聞風而遁縣城亦復蘭溪之賊爲按察使劉典自祁門旋軍於十二日攻克是日金華府城踞賊劉政宏等見官軍進紮白龍橋遂率黨由東門逃竄連升等乘勢奪門而入殺賊二千餘名遂復府城金華最得地勢城垣堅固異常厯代浙中兵事均以此爲關鍵攻取之難十倍他郡此次乘勝而克爲浙軍一大轉

機也

浙軍續克永康武義縣城收復東陽義烏浦江諸暨等四縣

自拔湯溪等城賊之險要已失永康踞賊亦爲都司馬雲標率勇擊退於正月十三日克復縣城總兵林文察同日攻克武義縣東陽義烏之賊聞風棄城向諸暨一帶潰竄按察使劉典於十八日收復浦江進逼諸暨有民團趙春林等探知城中踞賊僅五六千人因率投誠之方蒂桂等分路環攻

於二十三日克復

陝西軍收復興安府新舊二城

髮賊豫捻陳得才等於上年十月內由湖北之房
竹二縣竄入陝西旋於十二月二十等日陷興安
府新舊二城意圖久踞團總監生邱振家招集團
勇於正月十四日隨同知縣方傳理督率水陸各
勇乘夜薄城賊猝不及防放火奔逃立將舊城收
復縣丞周錫齡等乘勢趨新城亦棄城竄去有入

川者有竄紫陽縣者

浙軍署提督葉炳忠收復紹興府並桐廬蕭山二縣
浙東肅清

浙軍攻克浦江諸暨後賊首何文慶率黨由紹興
竄撲諸暨高連升等率眾抵禦賊敗遁而東陽永
康等處敗賊復紛紛竄至官軍合隊縱擊殺賊甚
多按察使劉典正欲乘勢規取紹興署提督葉炳
忠已於正月二十六日督甯波諸軍收復府城先
是金華克復賊膽已寒前甯紹台道張景渠會同
英國總兵呿樂德稅務司日意格及權授江蘇副

將達耳第福督率英法二國洋兵隨同葉提督進
攻達耳第福以銳進陣亡正月十九二十等日戰
於下方橋安昌塘均獲勝適賊黨楊應柯遣難民
持書詣張景渠營乞降願爲內應二十五日夜城
中火光四起賊首周姓率眾開稽山門向蕭山遁
去楊應柯開門迎降我軍一擁而進收復府城復
有敗賊萬餘與桐廬踞賊沿江築石壘抗拒水陸
合攻復將桐廬縣克復蕭山各賊猶閉門困守我
軍乘勝蹙之盡斃守陴之賊緣梯而上立復縣城

浙東肅清

二月僧親王追勦擒匪連獲大勝生擒擒首張落刑等磔之

擒匪各自爲股各有擒首以蒙毫之張落刑爲巨擘受粵賊僞封擾害楚豫江皖荼毒生靈較各擒首尤爲擒惡

欽差大臣科爾沁博多爾噶台僧親王自盪平北犯髮賊後總統東三盟馬步各隊專勦擒匪大小數百戰逐漸剷除時在蒙毫一帶勦辦適張落刑等聚

集尹家溝意圖旁突二月初一日僧親王派翼長
舒通額蘇克金等帶領各起馬隊馳往圍攻捻眾
拚死出撲截殺多名向東南竄遁侍郎國瑞帶托
倫布等馬步逕攻雉河集張落刑老巢落刑聞風
逃竄遂將雉河集尹家溝兩處賊巢全行平毀初
二至初七日舒通額等疊獲要賊正法擒首李勤
邦等赴宿州知州今安徽英巡撫翰行營投誠領
計將張落刑竝其子張禧義子王碗兒誘獲解送

僧親王大營奉

旨張落刑極刑處死張濬王碗兒一併正法傳首被擾
各處天下快之

曾營鮑軍攻破賊巢悉復西河小淮窑紅楊樹麒麟
山等四處要隘

偽輔王楊輔清糾合各偽王嘯聚西河紅楊樹麒麟
山等處不下十萬餘人以一大股抄出高祖山
之前以一小股繞過高祖山之背揚言上犯涇縣
實欲圖鮑超靈字老營也鮑提督令總兵宋國永
堅壁穩守親率數隊伏於太子廟山坳伺之二月

初一日賊分三四萬眾迤邐而來將高祖山八營層層圍裹鮑提督急率太子廟伏軍向小徑疾趨離營二里許聞老營槍礮連環知已接戰乃令各將弁分三路進仍令總兵梁美材等潛伏茯苓山之旁以斷賊後鼓角一聲三軍突出國永乘勢夾擊賊隊譁亂奪路竄走將近茯苓山美材大呼斷路賊駭懼無措眾軍合力蹙之追襲四十餘里遂平高嶺周家橋諸壘直抵西河結筏爭渡立毀堅巢馬家園小淮窰賊壘亦爲總兵王可升襲破維

時賊之由西河遁入灣沚者寔營礮划隨同外江水師日夜轟擊賊乃於初三等日歸併梅嶺麒麟山賊壘初四日鮑提督引軍渡河進次紅楊樹賊匿不出軍士踰濠直進盡毀羣壘初五日鮑提督遺書甯國守將劉松山令率師來會傳令國永等專攻麒麟山總兵婁雲慶等專攻梅嶺而以松山爲斷後賊糾眾來迎國永縱兵掩擊積尸層疊麒麟山賊壘悉平是日松山破廟埠之壘雲慶破梅嶺之壘並收復仰賢圩各處餘賊分道竄逸

川軍截勦長髮賊獲勝殲斃中旂賊首賴裕新

偽翼王石達開竄入四川以賊酋賴裕新卽賴剝
皮爲前鋒名爲中旂疊擾甯遠高巖等處因總兵
朱桂秋等攻急竄入越嶲廳城署同知周岐源等
連日力戰將賴裕新擊斃賊衆旣無統率拚命狂
奔闌入榮經天全各城知縣孫怡祿知州丁雲章
等於二月二十一二等日督帶兵團晝夜力戰克
復城池賊竄邛州之高家場邛州團練橫擊賊敗

退由大邑竄往邊江等處

鎮江軍截勦西路竄賊直抵丹陽

偽懷王周姓等糾眾竄至句容城外會合丹陽賊
首偽效天義陳姓圖由九洑洲北渡馮提督子材
派總兵張文德等扼橋據險分路進攻二月初五
日直趨牧馬口沿邨十餘里賊卡林立官軍馳突
不退游擊湛恩榮飛騎衝敵手殪賊目數名賊陣
稍卻守備李耀光從槍子中躍馬先登陣斬執旂
賊酋直擣中堅官軍無不以一當百立將牧馬口
賊卡全行焚毀東湖伏賊聞聲齊起文德派隊抄

截賊眾大潰追過句容縣境之薛邨斃賊三千餘
名內有僞來天安僞檢點二名文德等於初六日
夜銜枚馳抵南路柏林邨老巢總兵田宗揚等率
所部進紮豐樂山扼險憑高遙爲聲勢初七日卯
刻文德等乘大霧四塞揮軍疾攻精騎如牆而進
賊眾不測多寡出巢迎敵副將楊青山首先突陣
殲斃黃衣賊多名都司古龍光躍馬入陣斬陳賊
於馬下卽四眼狗陳玉成之叔也餘賊惶駭向西
南敗竄官軍乘勢奪毀柏林邨賊壘直追至丹陽

西門

上海軍解常熟昭文縣圍

正月賊圍常熟昭文甚急穴地攻城賊首譚紹洸又益以礮船二百艘水陸夾攻降將駱國忠悉力扼守李巡撫以福山背水而陳賊眾兵單極爲可慮急檄常勝軍往助二月初四日李恒嵩以千人至移營逼賊壘初五日福山石城之賊來援劉銘傳督隊擊敗之是時賊之攻常熟者雲梯地道皆具屢拒屢進勢漸危迫李巡撫議先奪石城以解城圍